

浙江文叢

輿地紀勝

〔第四冊〕

浙江出版聯合集團
浙江古籍出版社

浙江文叢

浙江出版聯合集團
浙江古籍出版社

輿地紀勝

〔第四冊〕

卷第三十三至四十七

〔宋〕王象之 編著 趙一生 點校

輿地紀勝卷第三十三

江南西路

興國軍

陽新

富川

磁湖

大冷

軍沿革

興國軍，同下州。《九域志》。《禹貢》：荊州之域。《元和郡縣志》云：本漢鄂縣地。《寰宇記》、《輿地廣記》諸書云，地理並與鄂州同。鄂州在荊州之域，故興國軍亦同在荊州。分野界于吳頭楚尾之間。按《鄂州志》鄂州楚地，翼、軫之分野。然興國西抵鄂東，抵江則亦宜在吳頭楚尾之間。《富川志》云：興國分野，費直《星曆》謂抵于南斗之十度，乃其首焉。《晉志》謂抵于軫之十一度，乃其尾焉。復以東坡《二十八舍辰次圖》考之，南斗十度，吳之頭也；軫之十一度，楚之尾也。然則興國界于吳、楚之間云。春秋以來屬楚。《楚世家》云：『楚熊渠伐揚粵，至于鄂，封其子紅爲鄂王。』《九州記》曰：鄂，今武昌。秦屬南郡。《史記》：『秦白起取郢爲南郡。』漢屬江夏郡之鄂縣及下雎兩縣。《西漢地理志》：『江夏，縣十有四，所隸有鄂、有

下雒。』又伍被謂淮南王安曰：『守下雒之城。』今下雒城，去軍四十五里。後漢因之。《富川志》。三國孫權改鄂曰武昌郡，分立陽新縣。《三國志》：『（吳主）建安二十五年，「吳主」自公安都鄂，改名武昌，以武昌、下雒、尋陽、陽新、柴桑、沙羨六縣爲武昌郡。』陽新今去軍八十里。《元和郡縣志》云：吳大帝分立陽新縣。《舊唐志》云：『吳分鄂縣置陽新縣。隋改爲永興縣。』晉以後因之。隋平陳，置鄂州。開皇九年，改陽新曰富川縣。《元和郡縣志》於永興縣下書云：『開皇九年，改爲富川。十八年，改爲永興。』又改富川曰永興縣。《寰宇記》亦在開皇十八年。唐因之。《唐志》鄂州領縣七，永興隸焉。《通典》所載亦同。五代屬吳及南唐。此據《武昌志》。皇朝平江南，地歸版圖。熊克《通略》在開寶八年。仍以縣屬鄂州。《富川志》。陞永興軍，縣仍隸焉。《國朝會要》在太平興國二年。又《長編》云：太平興國二年二月甲午，建鄂州永興縣爲永興軍。三年十二月甲戌，改永興軍爲興國軍。改興國軍，《國朝會要》在太平興國三年。隸江南西道，更置大冶、通山二縣。《國朝會要》並在太平興國三年。今領縣三，治永興。

縣沿革

永興縣，望。

附郭。《元和郡縣志》云：『本漢鄂縣地。吳大帝分立陽新縣。』《隋志》云：『隋平陳，改陽新曰富川。開皇十一年，使人牛洪奏，併永興縣入富川。十八年，又改富川曰永興，居高陵故城。』貞元八年，移於長樂鄉之深

口。《國朝會要》云：『太平興國二年，於此置軍，自鄂州永興縣來隸。』

大冶縣，〔緊〕^{〔11〕}。

《富川志》不載去軍遠近。《皇朝郡縣志》云：『在軍西八十八里。《寰宇記》云：『在軍北一百二十里。唐天祐二年，吳析武昌置大冶青山場院。乾德五年，南唐陞爲大冶縣，屬鄂州。』《國朝會要》云：太平興國二年，來屬地。鈐云：背肩長樂，面對千秋，水出含香，流歸永泰。』

通山縣，〔中〕^{〔12〕}。

《富川志》不載去軍遠近。《寰宇記》云：『在軍西北^{〔四〕}二百四十里，本永豐縣之新豐鄉也。吳武義中，隸羊山鎮征賦。周顯德六年，南唐建爲通山縣。』《國朝會要》云：『太平興國二年，以羊山鎮爲縣，後改通山縣。』與《寰宇記》不同。《國朝會要》又云：『太平興國三年，自鄂州來隸。』《繫年錄》云：『紹興四年正月乙亥，降通山縣爲鎮。縣爲盜所掠，遺民纔二百餘家，故廢之。』《圖經》云：紹興五年復。

風俗形勝

介乎吳楚之間。《富川志》。吳頭楚尾。周紫芝詩云：『看盡吳頭楚尾山。』東連江池，西控荆楚，郡小民醇。周紫芝《妙香寮記》。閤園晝閉，桁楊不施。同上。上按荆、鄂，下接江、池，面洪都，背

淮甸。《富川志·道里門》。富川介江鄂作壘。《貢院記》。山連楚嶠，水接湘川，石壁崢嶸，林巒鬱鬱。《靈峰和尚（實）〔語〕〔五〕錄》。江山之勝，似杭之西湖。王十朋《滄浪亭序》。王琪作《江南十詠》，以形容風俗之美。慶曆中，王琪出守日，作《江南十詠》，以形容風俗之美云。富川山水，甲于江右，有湖曰滄浪，外列群峰，中涵萬象。《郡圖記》。

景物上

印山 在永興縣西南一百里。《武昌記》云：『有山如印，有字髣髴。』

角山 《舊圖經》按《武昌記》云：『角山天欲雨，則有聲如吹角。』《寰宇記》云：在大冶場。

磁湖 在大冶縣。東坡謂其湖邊之石皆類磁石，而多產菖蒲，故後人名曰磁湖。《輿地廣記》之說

亦同。

龍山 世傳以爲孟嘉落帽之所。

龍洞 在大冶縣西三十里智通寺之側。林巒聳秀，山石巉巖，水田洞中出。

犀港 在通山〔縣〕〔六〕之西興善里。世傳昔有犀牛經涉，因名。

西山 在大冶縣西三十里。有白水臺，歲早望臺間雲起必雨。

〔瑶〕〔七〕山 在磁湖之右。山有石窩，名醉吟窩。

銀山 在永興。四環皆山，而多產銀，因名。有寺曰銀山院。

玉洞 在永興縣荆山觀旁。有玉洞，世傳卞和取玉之地。

回山 在大冶東五十里，西塞山之右。山有異泉及飛雲洞。《土俗編》云：唐天寶十三年，積雨之後，回山之巔忽有飛泉湧出，垂流四百仞，元結名之曰『異泉』，因爲作《異泉銘》。

峻山 《晏公類要》云：在州東南一百七十里。

沼山 在大冶縣西五十里。近保安市，絕頂有寺，懸崖有塔。

朔山 《武昌縣》云：朔山有竹長一十餘丈，圍數尺，嘗有聲，天將雨，此竹鳴焉，今無矣。在軍西五百六十里。

菁山 《輿地志》云：上有望夫石，石上生蕪菁。

景物下

十詠堂 在軍治。周紫芝有《江南十詠》，以形容風物之美。

百花亭 在軍治。

三柳堂 在淨勝寺之右。面瞰平湖，前植三柳。

萬卷閣 盛子充，永興人。內翰毛友出宰大冶，名其閣爲『萬卷』。子充詩云：『竹簡牙籤日滿前，何妨心醉六經眠。』

滄浪亭 在軍治放生池上。池荷彌望，繞堤皆楊柳，群山環列，若屏障然，隔池景物尤勝。臨水有十

詠堂，浮圖突兀在雲煙紫翠間，實一郡之奇觀。

恩波亭 在軍放生池之東。與滄浪亭相望。

鑑湖亭 在舊南城福勝寺後山之巔。

和政堂 在滄浪亭之南。

淨治堂 在宅堂之前。

捲雪樓 在富池忠勇廟。前臨大江，張安國書扁。

宿雲亭 在通山縣後山。取蔣之奇有『白雲深處宿』之句。

雲山閣 在軍治。

宏覽堂 在軍治西山之崗。

寄勝亭 在永興縣。

揖勝亭 在大冶縣圃。

占勝亭 在大冶縣前湖上。

安流亭 在磁湖之東，俯瞰大江。嘉祐四年立。

全真亭 在磁湖西溪上。天聖中，程叔良作。

清風閣 在磁湖大江之旁。治平中，程大年作。

翠屏亭 在通山。

塵外亭

在通山。

不欺軒

在通山。

無訟堂

在通山。

懷坡閣

在永興，李仲覽之居。仲覽登進士第後，瞰湖築室，號懷坡閣。王十朋過之，爲《賦懷坡》

二章。

藕花堂

在軍治政和堂之後。

桃花寺

在永興縣南五十里桃花尖山之下。寺中有（泉甘）〔甘泉〕^{〔八〕}，里人用以造茶，味勝他處。今

茶號曰『桃花絕品』。

蓮花山

在大冶西三十里。上有佛臺基，世傳東方朔遊玩之處。又有蓮花泉，在大冶智通寺之山巔。

散花洲

在大冶縣大江中流之南。世傳周瑜敗曹操于赤壁，吳（王）〔主〕^{〔九〕}迎之，至此醺酒散花以勞

軍士，故謂之吳（王）〔主〕散花洲。

飛雲洞

在大冶回山之巔。三洞層出，上洞出雲，中洞出水，下洞出風，其聲如雷霆。唐元結嘗讀書

于此，堂基猶在洞中，有元結像。

靈仙觀

在軍南十里。殿閣穹窿，廊廡深峻，四圍脩竹森然。觀西有別館，名曰『清虛』，乃皇甫先生

坦寓遊之所。

會仙巖

在通山縣。詳見仙釋門地行仙下。

朝真洞

在通山縣東。泉上有巖，容數十人，可攀援而上，穴中有異魚，具四足，長尺餘。

沉水山 在通山縣。上管里有仙人壇。

香巖院 在通山縣。院側有聽雪寮，綠竹軒前後，名賢留題甚多，周紫芝有詩。

吉祥山 在大冶縣東。《武昌記》云：「吳主微時嘗隱於此。羅隱有詩以紀其事云：『吳主微時隱此

山，吳都去後綠潺潺。嶺梅乍拆春粧薄，沙鳥晴分銘篆間。』」

豐寶場 離大冶縣九十里。出膽水，浸鐵成銅。

景德寺 在縣治。有唐人舒元興《記》尚存。

天慶觀 在軍治之北。天禧九年，頒金寶牌於天下，福地牌以精金爲之，長一寸九分，闊一寸，陽文曰

『玉清昭應宮，成天尊萬壽』，其背曰『永鎮福地』。今其牌尚存。

靈鷲寺 在大冶縣白雉山之絕頂。

通羊山 《寰宇記》云：在通山縣西八十里。

龍鬬巖 在通山縣九宮山望雲亭之後。

鳳棲巖 在永興。有寶門高四丈，闊二丈二尺，內有石寶，蓋石龍、石鍾、卧如來、禮拜僧、石田并小寶

陀。山巖穴深半里，故傳趙居士紙衣僧隱此。蔣之奇留題云：『空傳趙居士，不見紙衣僧。』

雞籠山 在永興縣東南八十里。湖山之巔有金雞隱伏，遇夜陰晦，其光往來出沒於湖山之間。

鳳山洞 在永興縣東八十五里。《唐地理志》云：有鳳山監，今有上下白砂二寺。

龍角山 在永興西八十里。兩峰相對，本名龍耳，唐天監〔寶〕〔一〇〕四年，改曰龍角。

鹿頭山 在永興縣。大冶亦有鹿頭山。

鳳凰山 在大冶。昔吳建興中，鳳凰降于此。

駱駝嶺 在通山縣九宮山望雲亭之後。

黃龍洲 山頂有臺，曰仙女臺，在富池大江之中。乾道〔中〕〔二〕新生，意非神龍莫能，故名曰黃龍

洲，屹然大江之中，舟楫皆夾洲而下，自是無風濤之虞。

石牛潭 在通山。後唐南米倉米耗大半，占者曰：此石牛所啖。因鑿其頤，自是米不復耗。

金牛塾 《寰宇記》云：在州西北二百七十里〔二〕。《輿地志》云：『昔有金牛從塾出，金牛長數丈，所

露出塾邊磧上，有遺跡。』

金雞石 見白雉山下。

白雉山 在大冶縣。《寰宇記》云：上有芙蓉峰，前有獅子嶺，後有金雞石。左思《三都賦》曰：『白

雉落，黑（鶴）〔鳩〕〔一〕零。』以證其名山有寺曰靈鷲，頂有龍泉。

白羊山 在通山。新豐里有白羊，每現於山頂則雲雨。

白水臺 在大冶西山。舊有宮王亭，每歲早禱，望臺間雲起必雨，至今以爲占。

白巖院 在永興院西八十里。依巖爲寺，而巖皆白石，故名。

白雲觀 在永興。舊名景星，貞觀中，景星見南方，李淳風奏曰：『永泰之兆，福地近在鄂，當本縣之

永泰鄉。』即其地建觀，賜名『景星』。乾封二年，景星再見，開元二十五年，景星又見。本朝嘉祐賜今額。

翠屏山

在通山西崇靈觀之後。上有東西泉，龍王祈禱之所。《輿地廣記》云：『上有石城，三面有

石壁，本名石城，唐天寶中，改名翠屏山。』

石鼓山

在永興縣。《元和郡縣志》云：『上有〔三〕〔四〕石鼓，鼓鳴，則天雨。』

石田驛

東坡曾宿石田驛。

石屋洞

在永興。形如石屋，高數十丈，峭壁崔嵬，內有垂石，擊之如鐘，尋流入洞二里，有石觀音像。

銀山院

在通山縣北十五里。四環皆山，而多產銀，故名。

東方山

在大冶縣北三十里。《武昌志》云：漢東方朔之故隱也。今有東方寺，乃唐智隱禪師道場。

《夷堅志》云：大冶縣山中東方寺，世傳曼倩嘗讀書於此，以是得名。寺後有泉一泓，凡邑人婦女來求嗣者，隨願輒得，故名曰聖泉。

西門山

在永興縣北三十里。山中有臺，其平如掌，名曰仙女臺。世傳昔有三小鬟至此問津，望其臺

而入，竟不復見。

西塞山

在大冶縣東五十里。張志和詩云：『西塞山邊白鷺飛。』袁宏《東征賦》云：『沿西塞之峻

嶠。』今俗呼爲道士磯。

南鄉山

在永興縣西南一百五十里。《舊經》引《武昌記》云：南鄉山有顯宗所建精舍。

小西湖

軍圃之湖也。王溉詩有『只應喚作小西湖』之句，郡人遂以小西湖目之。

大泉洞

在大冶縣東四十里。二洞相對，東洞中有仙人卧石，石鍾擊之有聲，有石田三十六邱，有石

稻，靖康中，鄉人避寇於此。西洞有樵人，常見龍鱗於洞石間。

大賢洞 介于泉臺、翠屏山之間，世傳有黃、張二道修真于此，後皆昇仙而去。有隱君子嘗題詩于洞門之右。

大城山 在通山縣東。後漢張平子隱此。

長樂堰 《唐志》云：在永興。貞元二年所築。

雙泉院 在永興縣北七十里。院之東西兩泉對湧，故名。

五龍山 《晏公類要》云：山有五嶺，狀如龍，在州西三百五十里。

九宮山 《寰宇記》云：『山在通山縣西南一百三十里』^(二五)，與翠屏山接連，晉「始」^(二六)安王兄弟九人造九宮殿於山。』《富川志》云：『九宮山乃伏虎禪師道場，其山自下而上高峰九層，故名九宮。山之來自南嶽長沙、九江廬阜，九十九峰之數，千崖萬壑，崎嶇盤折，山水之勝非一，又有九宮觀崇奉九真，以應九宮之名。』

千仞山 《武昌記》云：其山高萬丈。

富池湖 源出永興之翠屏六溪，至富池口入江。

仙女臺 在永興縣之西門山。

天尊嶺 在通山縣九宮山。

寶陀山 亦在九宮山。

觀音巖 在通山縣。紹興間，居民萬俊見雲氣盤結，光彩異常，尋其源，見一洞窈然，廣十餘丈，有石磬、石榻、石盞、石果，內有一石儼然觀音之像，若雕琢而成，傍有人物森列，千怪萬狀，邑宰朱朝仙爲之《記》。

羅漢院

在富池鎮。去永興縣八十里，壁間有錢易內翰墨跡。

神遊洞

在大冶縣東三十里，白額山之陽。巖石崎嶇，如層樓然。詳見仙釋門神遊洞道士下。

古跡

故安昌縣

《寰宇記》云：『在永興縣西北九十里。梁普通七年置，隋開皇九年，併入富川縣焉。』

故富川縣

《寰宇記》云：『在永興縣西南五十里平川。隋開皇九年立，十一年併入永興縣。』

故奉新縣

《寰宇記》云：『在永興縣西南一百二十里^{〔一七〕}。《輿地志》云：吳大帝立。《武昌記》云：

『晉義熙中，下雒縣併入奉新。開皇九年，廢奉新，入富川。』

黃石公城

《九域志》。

下雒故城

《元和郡縣志》云：『在永興縣東南一百四十里。《富川志》云：去軍城四十五里。不同。』

陳永興故城

《元和郡縣志》云：『在永興縣東五十里。東臨江水，俗傳子胥所築。』

子胥城

《元和郡縣志》載永興故縣有舊城，乃子胥所築，今去軍六十里。

曼倩山

在大冶。亦名靈峰山，上有十二面，四向望之如一，近則低小，遠則高大，昔東方朔讀書于此，今堂基猶存。周紫芝詩云：『先生自以滑稽雄，何事偷身入漢宮。跨鶴乘鸞本無定，安知不到此山中。』

闔閭山

在永興。《武昌記》云：『昔闔閭與楚相持，伍子胥屯衆于此。』《史記》云：『闔閭九年，子胥

伐楚』是也。今有闔閭城。

孟嘉宅 《寰宇記》云：在永興縣西南一百一十里。《武昌記》云：『嘉有重名，爲（亘）「桓」溫長史。有墓在縣西。』

鍾繇墨池 《寰宇記》云：在永興縣西南一百七十里。《漢書》云：『鍾繇少學書於此山，臨池

「學」書，池水盡黑，今其地名鍾山。』

張平子宅 《寰宇記》云：『在永興縣西南四百里^{（一九）}。衡少居翠屏山，今開鑿之所儼然。』

乖崖遺迹 在通山縣。世傳乖崖讀書于此。

陳朝檜 在富池羅漢院。有古檜一株，其大數十圍，世傳陳朝所植。

東方朔讀書堂 在大冶之東方寺。

元結讀書堂 在大冶之飛雲洞。今洞中有元結石像。

富池甘將軍廟 在富池口。靈應顯著，褒封薦加，邦人尊敬，飲食必祝，其顯異之迹有碑以紀，今賜

名顯勇廟，又有甘將軍墓在廟側。《繫年錄》云：『建炎四年，詔加封吳將富池爲昭毅武寧靈顯王，以劉光世有請也。』《夷堅志》云：『建炎間，巨寇馬進自斬，黃度江至廟下求杯珓，欲屠興國，神不許，至于再三，進怒曰：『得勝玦亦屠城，得陽玦亦屠城，得陰玦則并廟焚焉。』復手自擲之，一墮地，一不見，俄俯著于門頰上，去地數尺，屹立不墜，進驚懼拜謝而去。迄今龕護於故處，過者必瞻禮。殿內高壁上亦有二大玦虛綴楣間，相傳以爲黃巢所擲也。』

慕容暉廟 《晏公類要》云：在□□縣西南一十里。（符）〔苻〕〔苻〕堅爲晉謝玄所敗，暉遂奔江表，依山爲柵自固，後立祠。

李王墓

在郡南百餘里。《富川志》以爲李王煜墓，云：「王歿之後，造五十餘棺，同日出葬，以爲疑冢。今翠屏山亦有石獸等物猶存。按李王煜自開寶歸朝之後，不應再葬江南，此墓疑爲李先主知〔詰〕〔誥〕〔二〕及中主墓，恐非後主煜也。」

甘將軍墓

在富池廟側。

官吏

〔國朝〕·王琪，慶曆間爲守。

楊繪，元豐間爲守。

李宜之，建炎間爲守。《富川志序》

云：自太平興國以來，如楊繪、王琪之文章事業，李宜之捍難。

董夢授，名敦逸，永豐人。紹聖初，累遷

侍御史，夢授曰：「臣再擢言路，第恐擠逐，不能久奉彈劾之責。」哲宗曰：「汝能言，無患朕不能聽；汝言信，無患朕不能行。」俄出知興國軍。《事略》。

周紫芝知興國軍。紫芝非進士出身，（又）〔而〕〔三〕爲史官，前此未有，故出之。《繫年錄》。

段拂，《繫年

錄》云：「紹興十八年，參政段拂罷，尋落職，興國軍居住。以秦檜怒其歎息趙鼎之死於海南故也。」

陸九

齡，《言行錄》云：「乾道中，爲任興國軍教授，興國民寒，罕游學校，九齡勸綏引翼，士興於學，興國學廩名存實亡，九齡核實催理，士得其養。」

張漢卿，《夷堅志》云：「張漢卿者失其名，淳熙三年秋，爲興國軍酒官，視事纔三月，若有所不樂，取吏部所給印紙曆大書和陶靖節《歸去來詞》，束裝徑歸鄉里。」

李儀，《中興遺

史》云：「紹興元年三月，李成徒黨退興國軍，執知軍李儀奔淮南。後儀及一親隨僕遁走得免，儀衲襖中有碎金（十數）〔數十〕〔四〕兩，至江州對岸一小寺中，腰間出興國軍印示其主僧求安下。僧見儀衲襖中是有物者，遂夜

并其親隨僕縊殺之，棄屍寺後。僕稍蘇，自解其繩，走至江邊，得小舟乃度，詣江州密訴，盡捕僧行，鞠勘是實，追黃金數十兩，興國軍印乃擲棄江中不獲，僧人與同惡者皆陵遲處斬。」

人物

「唐·張志和，字子同，婺州金華人。年十六，擢明經，以策干唐肅宗，後坐事貶南浦尉，遂不復仕，居江湖，自稱煙波釣徒，著《玄真子》。嘗往來垂釣于大冶縣西塞山之下。」^{〔二四〕}

「南唐」·吳舉，字大冲，永興人也。南唐時，主彭澤簿，王師渡江破池陽，遣使招降郡縣，至彭澤，其令欲以城降，舉以大義責之，遂殺使者，爲李煜守。及煜降，舉爲遊兵所執，主將責以殺使者之罪，舉曰：「固當如是耳。」主將義而釋之。（後舉之）

子中復。吳中復，字仲庶，登景祐進士第。其兄弟幾復、嗣復皆聯名登科，故號其鄉曰崇儒，里曰雙遷，中復由御史登法從，仁宗以飛（帛）^{〔二五〕}書『鐵御史』三字賜之。

吳鶚，字子平，範之子也。爲光祿寺丞，雅好山水，尤奇廬阜，嘗作詩云：『買山不問錢多少，知對廬山第幾峰。』

吳嗣復，字昌卿，鶚之孫也。與兄幾復同登天聖進士第，嗣復刻苦嗜學，爲文敏捷，日就十賦。子審禮。

吳立禮，字子初，中復之子也。爲御史，直言不避，有父風烈，弟則禮，應賢良科。子恍，棄官不仕。

李翔，字仲覽，永明處士李太古之孫也。蘇東坡移汝州，日同陳慥季常、參寥過其家，留題于壁，其家有懷坡閣。

盛子充，永興人。親喪廬墓，鄉曲稱其孝。其家藏書甚富，有閣曰萬卷閣。子充與王黼同舍，黼登相位，一無所求，仕止朝奉郎。

（張志和字子同婺州金華人年十六擢明經以策干唐肅宗後坐事貶南浦尉遂不復仕居江湖自稱煙波釣徒著玄真子嘗往